

INUIT ATAQATIGIIT

INATSIARTUNI



UPA 2015/54
Ane Hansen
14 april 2015

Upernaviup eqqaani nunaqarfimmi Kullorsuarmi timersortarfiliorsinissamut Naalackersuisut AIS 2016-mut 25 mio.- koruninik immikkoortiteqqullugit pequneqarnissaanik Inatsisartut aalajangiissasut siunnersuut.

(Inatsisartunut ilaasortaq Hans Enoksen, Partii Naleraq)

Inatsisartuni ilaasortaq Hans Enoksen, Partii Naleraq siunnersuuteqarpoq Kullorsuarmi 2016-mi timersortarfiliornissamut 25 mio.-nik Namminersorlutik oqartussat aningaasaliinissaannik Naalackersuisut pequneqassasut.

Inuit Ataqatigiinnit isumaqatigarput sungiffimmi timersornermilu periarfissat sammisassat sapingisaq tamaat siuarsartuartaqartut. Tamannalu susasaqartut tamaasa qanimut suleqatigalugit ingerlanneqartariaqartoq pingartittorujussuuarput.

Pisussaaffiit agguataarneqarsimanerani Kommuni pisussaavoq sanartugassanik kissaatinik tulleriarissalluni. Qaasuitsup Kommuniata 2016-mut sanartugassanut kissaataani tulleriakkani Kullorsuarmi timersortarfeeraliortoqarnissaanik kissaammik takussaasoqangilaq. Ilisimangilarput Kullorsuarmi innuttaasut timersortarferartaarnissamik kissaammik kommune-mi qinikkanut apuussisimagaluarnersut, taamaattoqarsimappallu Qaasuitsup kommuniata pisussaaffigaa sanartugassanik kissaatinik tulleriarinermi inissiissalluni.

Siullermiilingilagut pisussaaffiit agguatarneqarnerani kommuninit pisussaaffigineqartut kommunit pineqartut qulaatiinnarlugit maani inersuarmi siunnersuutinik oqalliseqartarluta. Tamanna tupinnangitsumik kommunini pineqartuni iluagineqartarpoq siunnersuutit pillugit tusarniaffigineqarneq ajoramik oqaaseqartinneqassanatillu. Taamammatt periarfissaq manna iluatsillugu oqaluuserisassat inersuarmi maani oqaluuserineqartussatut akuerineqarsimasunik Naalackersuisunut akissuteqartussatut pisussaaffilerneqarsimasunut kaammattuutigerusuppaput kommunit siunnersuumut attuumassuteqartut siunnersuut pillugu oqaaseqartinnaannik periarfissittaqqullugit. Manna tikillugu kommunit susasaqartut qulaatiinnarlugit sanartukkat kommunit sillimaffigingisaannik aningaasartuutitigut ajornartorsiutissiisarmata.

Siunnersuummut kommune attuumassuteqartoq tusarniaffigineqarsimatinnagu siunnersuut taama isikkoqartillugu ilalingilarput.